

## Poschte

De Lockdown isch för älteri Lüüt ned ganz eifach gsi. Zom Glöck heds veli Mönsche gää, wo in solidarischer Osterstützig gholfe hend, au vell vo de jonge Generation. Aber guet gemeint isch nid immer scho guet gemacht – ond so hed sich denn öppe zeigt, dass de Grabe zwösche de Generatione doch ziemlich gross isch

Dario: Hallo Frau Aecherli, ich bi zrogg. Mission Accomplished !

Frau Aecherli: Jo, das hed jetzt aber scho chli duuret. Ich ha dänkt, du chiemsch überhaupt nömm. Was hed de so lang bruucht ?

D: Also de Kafi hani schnell gfonde, ond au de Zocker ond d'Eier ond was alles no of de Lische gsi isch. Aber s Poschte isch e chli schwieriger gsi.

A: Aber wieso, ich ha der jo's Gäld ggää.

D: Was söll ich metem Gäld. Ich ha Ehne gsäid ich mach das gratis für Sie, Frau Aecherli. Jong ond Alt müend zäme schtoh, dromm ben ich jo doo.

Aber Sie hend käi Account gha. Ha öberläit, öb ich Ehne eis sell iirechte, aber denn han ich's öber miis gmacht – isch eifacher.

A. En Account ! es Konto ?? Ich bruche käs Konto, ich zahle alles in bar.

D: In Bar ? I welere Bar ??

A: Was ? Ich verschtöhd dich ned, jonge Maa. Ich zahle mini Sache immer in bar.

Ond ich loh mer vo niemerem es Konto lo aadräie. Das schmöckt mer irgendwie noch Enkeltrick, so **blauäugig** beni de ned.

Eigentlich schad, Dario, du hesch mer rächt en abklärte lidrock gmacht.

D: Notürlich ben ich abklärt, mehrfach. ADHS, Lese- Rächtschriibschwächi, Dyskalkulie – s ganze Programm.

A: Los, gnueg vo dem **Tanz** – chönntscht jetzt ned die Sache uuspacke ?

D: Frau Aecherli, Send Sie komplett vo vorgeschter ? Ich has postet, of Insta. Das chammer ned vöregää, das chammer nor aaluege.

A: Ich verschtöhdne nor Bahnhof.

Ond so ändet die guet gemeinti Aktion vo generationeübergreifender Solidarität miteme **klirrende** Misston. Na ja, was chammer anders erwarte vonere Generaton, wo Akku meh gelt als IQ, wo vom schuelische Provi zom Profi-Fuessballer promoviersch, wo folge nüd meh gelt, aber followe alles.

Aber halt – das mues ned so sii: Eusi Gschecht ändet nämlich anders ...

Bald scho lüüteds bi de Frau Aecherli, ond das immer wede. Ond doss stönd em Dario sini Frönde ond Kollege ond – äbe - irgendwelchi Follower, wo sine Post gläse hend – de Ben, de Len ond de

Sven; d Mia ond d Ria ond d Lia; ond die brengid de Frau Aecherli alles was sie brucht: Kaffii, Eier, Milch etc., alles was of erere Poschti-Liscthe gsi isch, alles was sie im Dario sim Post gläse hend. D Frau Aecherli hed am Schloss alles dopplet ond drüüfach - alles gratis - ond dezue no es paar nätti Begägnige. Ond d Frau Aecherli dänkt sich: Käi Ahnig wie die Jonge das hött möchid. Aber sie möcheds – ond sie möcheds super !

5. Buchfestival Olten, Schreibwettbewerb 2021: Urs-Sepp Troxler.